

CARNAVALSMENU



Beer-waffele !!

Nao 't groete succes van veurig jaar: bruidsje weurs, e mekkelik recept veur de carnavalsdaag, kraog veer de opmerking dat 't allemaal te lang doorde en dat 't bakke of koke allemaal van d'n dreentied aaf ging... Daorum dit jaar e recpt mét beer, zoedat geer oonder t bakke én t ete gewoen door kint goon met dreinke. Ideaal toch?

Sjpeciaal veur uch dit jaar n nuij-oud recep veur Beer-waffele. (Iet op, neet swaffele, dat is get gans anders...) Dit recept houw eigelik al in 't Bemels Bakbook motte sjtoon, mer aangezeen gans Bemele d'r niks van bakte hōbbe veer die planne oetgesjeld.

Wat d'r in mot: (veur 10 persone of 5 met honger)

- 250 gram zelfrijzend bakmèel
- 150 gram witte basterdsokker
- scharrel 3 eier bee elkaar (3 sscharreleier...)
- 125 gram roumboter
- num dit recept met e bitteke zout
- 5 flesjkes beer

't sjoene is dat geer uch eige beer kint oetzeuke: Doonker beer, pèls, e sjoeske of unne haufum.... Wat geer wèlt..

Goeij alles bee elkaar in unne komp (iers t meel, de sokker en t zout, dan de eier en de gesjmolte boter) Doeg heij bitsje bee bitsje 250 ml Beer doorheen en reur tot un gladde massa. (de res van die 5 flesjkes kint geer gewoen opdreenke...) Bak 't besjlaag in un waffeliezzer (miestal 2 x 2 minute ongevaer aan allebei de kante sjoen broen) Es de ierste misluk, is dat neet zoe erg, dat is met keender miestal ouch zoe... de volgende zeen altied beter, hè Luc?

es ze get druug zeen dan mot geer ze gewoen doorsjepeule met ein van die 5 flesjkes... Wilt geer get rus hōbbe dan deil de waffele oet aan de res, want met n waffel in dn waffel hilste dien waffel...

De kopere Kromme



Eeder jaar weurt traditiegetrouw ouch de kopere Kromme oetgereik veur luij of vereniginge die zich biezunder verdeenstelik hōbbe gemaak 't aafgeloupe jaar... Dit jaar geit de Kopere Kromme nao:

Dansgroep Bemelen (onder de bezielende leiding van Wendy en Senna)

Nog neet zoe lang geleje opgeriech mer noe al hiel fijn optrejes die de luij blij make !! Veer houpe nog hiel lang van eur denspeskes te kinne geneete !!

Jo Troisfontaine

Veur al die jaore die heer van alles en nog get veur van alle vereiningen en luij haet gedoon (en sjtiemek nog deit...). Zoene gooje (secretaris) hōbbe veer nog neet gehad....

Stefan Pirnay

Sjtille krach (en soms ouch get minder sjtil) in de raad van ellef. Es dr get te regele velt is heer dao en brink os regelmatig 't leech... Daoneve trouwe supporter van de FC, en die vinste ouch neet mie zoveul....

Bedank allemaal veur eur bijdrage aan us dörp. En geer wet: Es 't durrep get veur uch beteikekent, probeer dan ouch get veur t dörrep te beteikene.....

ADVERTEERDERS

Onderstaande bedrijven steunen de Carnaval in Bemelen, steunt u hen ook?

Dreessen bouwkundig advies BV - Tom van Leeuwen - Cafe 't Plateau - Gastrobar "Die Twie" - Hotel Bergrust - P. Heijns Installaties - Camping Vinkenhof - H&R Andriën Loonbedrijf - Nijskens Grondwerkzaamheden - Thomassen Plantprotection BV - Hanos Valkenburg - Electro Duijkers - van Gregor - Bér Huynen Land & Tuinmachines - Cafe Zuid - Crijns Bandenservice BV - Theetuin Enchanthee - Up-stage - Dierenkliniek Maastricht - Paul Bovens architectural design - Gezondheidscentrum Bemelen t.a.v Corine Politsch - De Bonte Haan - Mourmans Infra Support - Bistro Papillon - B&B st. antoniusbank - 'T Krutje




De Gekkegazel

Carnavalsgazet van CV de Berggeitte 2025



“dat kin net”

“FC Bemelen kan net niet vinden” aldus de kop van De Limburger afgelopen november. Op ziech gein veurpagina nuijts deenke veer dan, die van Bemele kinne al 'n paar jaar 't net neet mie veende. Mèh wat waor d'r dan zoe biezunder dizze kier dat dat in de krant mos? Neij, noe koste ze de daag veur de wedstrijd 't net al neet veende... Kaom 't mesjen door 't feeske van Bots, dat de sjpelers toen net get teveul in 't glaas houwe gekeke? Neij huur, net toen ze wilde goon voetballe, zaoge ze dat 't net in de gool aan allebei de kante waor verdwene. Gelukkig hing 't vangnet d'r waal nog en aangezeen ze dat in de wedstrijd miestal waal weite te veende kos d'r eigelik gewoen gevoetbald weure... Lei how sjus nog lijne getrokke, zoedat d'r tenminste un bitteke lijn in 't sjeel van de FC zou zitte want d'r waor al weke sjprake van un dalende lijn. Mer inmiddels hing de KNVB al aan de lijn (en die weure neet gaer aan 't lijnsje gehouwe) want die dachte dao gans ander euver (dat laog ouch e bitsje in de lijn der verwachting, die zeen dao lijnrech in). Ouch tegesjander Mergraitte waor neet blij want die vusjde zoe ouch achter't net en voonte 't neet netjes van de FC. Dus mos de FC op zeuk, nao un net en nao de dader... Dat letste kos neet meuijlik zeen, de dader mos óf un hiel gooj sjierbeweiging in hoes hōbbe, of unne messcherpe teckel...




Wat is t versjeel tusse un Pilske en unne Penalty ??

Un Pilske geit d'r altied in...



Aangezeen veer al jaore gein gooj sjier mie gezeen hōbbe op 't veld en heij allein golden retrievers en herders roond loupe kos 't bijnaa geine van Bemele zeen gewès. Mer wee dan wel, wae is dao dan geknip veur? Is 'n bitsje verknip, of is sjus gein knip veur de neus weert? Tot noe touw is de dader door de maze van 't net geslope... Op zeuk nao un nuij net dan mèr,... dat is nog net neet zoe mekkelik en hiel deur terwijl de FC toch al net de kop bove water kin houwe. Gelukkig haet de FC unne veurzitter met un groet netwerk. In ierste instantie haet dae us nagevraag bee Delta, die houwe toch net un glasvezelnet aangelag...

Mèr dat bleek gein gooj oplossing, Ouch de netbeheerder van Enexis houw gein oplossing (netbeheerder van niks...) dao kaom allein nog mie netsjpanning op 't gesjprek te sjtoon. Naodat heer 't iers nog houw geprobeerd bee Netflix is de veurzitter mer op 't internet oetgekomme... Oeteindelik haet heer nog op tie dua neuij nette oet kinne hole veur netto € 499,- euro, net gein viefhonderd euro. En zoe hinge, net op tied veur de wedstrijd tege Mergraote de nette weer netjes op hun plaats. Mergraote voont echter dat de FC nu in 't veurdeil waor want aangezeen Bemele zelf de nette houw opgehangen wiste die netuurlik precies boe die hinge... Jaomer genog bleef 't sjpel van 't ierste net zoe sjleg es iers want zelfs in de daonao met 2-3 gewonne wedstrijd wiste zee mèr éine kier 't net te veende en houwe ze de tegesjtander nudig die twee kier 't eige net voonte... D'r zeen vergaonde geruchte dat d'r bee de FC gewerk weurt aan unne nuije soap rondum de club met de titel “de (net gein) kampioene”, uiteraard alein te zeen op....Netflix...



Wls geer dat...?

Netuurlik haet de redactie ouch dit jaor weer heur oer te luustere gelag in Bemele um uch de letste roddels te kinne vertelle. D’r is netuurlik neet zoeveul gebeurd dit jaor mer toch.... En es ’t neet woer is, dan höb geer ’t neet van os...

Wls geer dat...?

- veer hiel teleurgesjeld zeen in Delta umdat veer noe nao jaore wachte eindelijk (bijnao) glaasvezel höbbe mer nog sjteeds gein glaas beer van Delta gezeen höbbe?
- veer t hiel knap veende dat ze bee de opgravinge hei ech álles höbbe geraak wat d’r te rake veel? en dat veer sjtraks dus Internet höbbe mer gein water, sjtroum en gaas...
- dat dr zelfs hoeze ontrumd zeen in ’t centrum van Bemele umdat d’r sjprake waor van unne gaasloch...
- oeteindelijk bleek dat Lei de aovend te veure e feeske houw gehad?

Wls geer dat...?

- Peter Jan van die Twie weer terök geit nao Mestreech? En hoewel mestreech neet breid is mer laank, heer es heer de brak verkoch haet ’t toch ouch breid haet?
- In de weentermaond d’r un Koek en Zoepie tent achter de café sjteit?
- Dyane un sjoen prograam haet die “Dy andere vrouw” hiet, mer veer os pas zurg make es Flup un show haet die “Dy andere vrouw” hiet...
- Geer met carnaval bee Die Twie mot betale es geer mot? Dat Flup ’t concept statiegeld neet good begrepe haet umdat ze normaal geld kreigst este get trök brings?
- geer tegewoordig ouch bee Enchanthee op ’t Wolfshoes kint goon ete? Mèr zee d’r waal un putsje van make zoedat geer mèt kint ete?
- Bee de 80 jaorige bevrijding dao ouch nog echte oorlogsveteranen höbbe gegete...
- _ zee dao un prachtig buffet kreege met greunte en blomme? Zoedat zee nog sjteeds denke dat veer heij tulpebolle ete?
- Veer eniggzins teleurgesjeld waore omdat veer dachte dat ze os noe eindelijk van ’t wolfshoes kaome bevrijje?

Wls geer dat...?

- Bemels Beste Boeren Bergloop aafgeloupe jaor un groet succes waor?
- En dat dit noe oonder de noemer Bemelen Beweegt velt en same met de voetbalclub weurt georganiseert?
- Sommige bestuursleden van de FC zoe enthousiast waore dat ze sjpontaan ginge vlaaiere veur de loup?
- Dat noa dit succes ouch de SM loop in Meerssen is euvergenomme? En dat SM sjteit veur Strenghe Meesteres?
- Ouch de Banneux loup door hun weurt georganiseerd?
- Dat de “jong garde” ouch unne Banneux haet geloupe mer dan andersum?
- dat ’t einddoel dus neet un keerske opsjteke in Banneux waor mer un glaas beer dreinke bee Royke thoes.
- Dat daomet un nuij bedevaartplaats is ontsjtange namelijk de keersewei in Bemele boe eeder jaor mie en mie lui joet Banneux nao tow komme loupe um dao un glaas beer te komme dreinke?
- veer os waal aafvraoge wat veur versijning Roy eielik gezeen haet? En es ’t Maria waor of ’t dan neet toevallig de buurvrouw van twie hoeze weijer waor, die hiet ouch Maria...

Wls geer dat...?

- ’t bergaaf geit met de FC Bemele? En zelfs ’t 35+ team gewoen néét kampioen is gewore?
- dat zee op ’t letste tournooi höbbe besjlote dan mer un waterpolo club op te riechte?
- ’t twiede net es de carnavalsvereniging al blij is es ze 11 man bee elkaar kriege?
- ’t ouch waal veelzeggend is es zelfs sjpeler van de dag bee Keer voetbalt?
- De FC zich toch neet hoof te sjame umdat noa ’t fees van de hermenie ’t neet ’t innige ver lees is dat op sjportpark de Sjleutel is geleije.

Wls geer dat...?

- Noe veer ’t toch euver de hermenie höbbe, zee ziech met sjteun van de club van 100 unne nuije vibrafoon höbbe gekoch veur € 4500,- ?
- veer die op Easytoys al veul goodkouper höbbe gezeen?
- veer alsnog ’t zangkoer nog unne kier wille bedanke veur hun bijdrage aan ’t feest.....?
- Dat ’t zangkoer euveriges noe op maandags geit repeteren en dat dan nét de café gesjlote is?
- en dat veer höbbe begrege dat ouch d’n oksaal gesjlote is.
- dat zee dus um te zinge én um de keel te sjmere urreges anders terecht motte... -

Dat zeen Sjlaeg

Vraag: wat is eine preens zonder scepter?

Antwoord: eine hauve preens...


Vraag: wat is eine preens mèt eine hauve scepter?

Antwoord: Dion...

Mesjiens höb geer ’t neet gans mèt gekrege, aafgeloupe vastelaovend, dus eve in ’t kort: wie preens Dion, enthousias wie altied, ’n röndsje wou geve, en mèt ziene scepter eine sjlaag tege de bel gaof, braok ’m dat deenk in twieje... Woe dat door kaom? Gein idee. Mesjiens haw heer tijdens zien preensetraining gèt vööl fitness gedoon, get vööl krachvoor gehad... Wie dan auch: scepter nao de filistijne... Geer kint waal raoje wie dat aankoom. Preens gans van zien sjtuk – heer wis neet meteen of dat van ’t oonderste of van ’t bovenste sjtuk waor – en de raad van ellef van sjlaag, alle beer sjpontaan versjaald, ’t röndsje woord veerkantig, gooje raad waor duur en mieër van die dinger.

Wat is eine preens zonder scepter? Al sinds de oer-tied is de scepter - vermoedelik waor ’t oorspronkelijk eine knots – ein symbool van mäch en autoriteit veur vorste van allerlei sjlaag. Wè de dikste knots haw, kos de zjwoerste sjlaeg oetdeile, en waor dus automaties de baas. De opperknots. Of knotsgek... En dae moch bee gelegenheid met de knots roondzjweije, zoedat eederein auch kos zeen dat heer de baas waor. De scepter zjwèije, neume ze dat tegeswoordig. Trump euver Amerika, Schoof euver Nederland, Dion euver Bemele (allemaol zoelang es ’t doort...)

Eielik is ’t al hiel lang neet mieër de bedoeling dat bee dat zjwije eemes geraak weurt. En al hielemaol neet dat dae scepter gebruik weurt um beer te besjtèlle. Mèh ja... ’t Is fees, ’t is drök, ’t is gezellig... Dan kinne die deenger gebäöre. Zeker este nog eine jonge bok bès in ’t Riek van de Berggeitte. Dan wilste nog waal ins vergete datste mèt dae scepter eine auwe bok (op eine sjtèk) in han höbs... ’n Oongelökske is zoe gebäörd... Dat is auch niks um meteen de bokkepruuk van op te zètte, of um van diene sjtèk te goon (of allebei tegeliek, zoelang de bok en de sjtèk nog neet gesjeije zeen...)



Ach, dae scepter? Dao is al van alles mèt gebäörd. Dae is al geklauwd, ontvoerd veur losgeld, per oongeluk vergete, mit beer geduip... Dae haet al get mitgemaak in zien lange leve. En heer haet tot noe tow alle euverlaef. De maker, oud-preens Jean I, wis mieër es eine hauve ieuw geleije waal wie-ste zoe’ne geitekop in de sjteel moos sjteke.

Netuurlik keump ’t waal good mit de scepter van de preens van Bemele. Van ’n verbroke relatie tusse de Berggeitte en hun historie is gein sjpraake. En Dion is auch al lang euver de klap heen... In Bemele keump altied alles good, vreug of laat. En dan belle veer weer veur ’n röndsje... Wie ’t zich huurt.

Want wat is eine preens zonder scepter?



Help mien besjtuur is klusser..

Veer koome d'r neet oonderoet: de soap roond de verbouwing van os gemeinsjapshoes blijf veur os lezers – en in eeder geval auch veur de redaksie – ein van de populairste onderwerpe in dees vastelaovesgezèt. Eeder jaor weer zitte veer vol sjpanning te wachte op de gebäörtensisse die zich dao weer aafgesjpèèld höbbe. Of neet... Gooje Tijde Sjlechte Tijde is d'r niks bee. Daorum, speesjaal veur de fans, vandaag aaflevering 762 (kin auch 763 of 764 zeen, veer rake langzaam de tèt kwiet...).

Iers eve eine korte trügkblik. Jaore geleie woorde de ierste planne gemaak veur 'n groetsjeepse verbouwing van 't gemeinsjapshoes. De zaak woord veurtvarend aangepak, 't zou fantastisch weure, 'n seerraad veur 't dörrep, 'n luxe verblief veur alle vereniginge... De soap ging mèt vööl sjwung van sjtart. En daonao kaome 760 (of 761, of 762...) aafleveringe woe-in vanalles gebäörde – zagte ze tenminste... – mèr veural achter de sjerme, dus neet in beeld, dus kos 't eigelik geine precies volge.

Veur eederein dae nao al die wazige verhaole de mood in de sjeun dreig te zakke, höbbe veer vandaag good nuijts: d'r is weer van alles gaonde, en binnekort kint geer dat auch zellef zeen. De langst loupende soap van Bemele haet namelijk de aandacht getrokke van Hilversum. Ein van de groete umroope – veer maoge nog neet verraoije welke – wil namelijk 'n programma goon make euver 't projèk gemeinsjapshoes.

Euver de titel weurt nog naogedach, mèr volges eine woordvoerder van de umroop moote veer bee de inhoud deenke aan eine mix van 'Help, mien besjtuur is klusser!' (kiek wie Paul en Henk zèllef de sjlopershamer höbbe opgepak...), 'De rijdende rechter' (dae weurt te hulp geroope imdat de mieste klussers bee 't gemeinsjapshoes leenker han höbbe), 'Buurman en Buurman' (um te bemiddele bee eventuele probleme mèt de umwoenende...) en 'De perfecte verbouwing' (um te laote zeen dat 't soms hielemaol neet zoe perfect geit...). Es prizzentator höbbe ze in Hilversum André van Duijn in gedachte. Dae haet ervaring mèt bakke, en moot dus auch oet de veuj kinne mèt luij die d'r niks van bakke...



Wie dat aflöp? Dao moote veer uch nao laote raoje. Nou ja, 'n paar klein tipkes van de sjluijer: d'r keump 'n gemeinsjapshoeskamer in de keuke (of zoe gèt) en d'r is sjpraoke van veuroetich (of achteroetich, of gaaroets gein oetich) op 'n zjwumbad. Of waar dat gewoen 'n leekend daak? En es eederein dan veurtaan auch nog z'ne eige sjtroumgenerator en keuling mèt wil bringe (volges sommige sjtraks auch nog z'n eige beer, mèr dat liek os tamelik euverdreve...) dan kin 't allemaol net binne de begroeting. Enfin: veer houwte 't weer allemaol veur uch in de gate. En mèt 'n bitsje gelök kint geer in dees gezèt volgend jaor aaflevering 763 (of 764 of 765) van dizze soap leze...



Nuijts van 't kerrekbesjtuur

Um de mis nog aantrekkelijker te make, en nog mier kerkgangers te trekke haet 't kerrekbesjtuur besjlotte um de kerrekegangers tegemoet te komme met un hiel eenvoudige aafsjtandsbedeening boe met geer de mis en 't gezang aan kin passe aan uch eige voorkeure... De aafstandsbedeening zal nao asgoonsdig op preuf in gebruik genomme weure...



Nog mier "Wis geer dat?"

Wis geer dat...?

- De burendag in 2024 is aafgelast, zoegenaamd veur 't waer?
- Veer oet betrouwbare bron höbbe vernome dat ouch de buurvrouw van Peter Beaujeaun in dezelfde tied is vetrokke en dat waal hiel toevalig is...
- Veer zaoge dat Dreessen weer in de raad zit in Eijsden Mergraote?
- veer eve dachte dat Wiel de hoonderd jaar toch wouw volmake?
- 't mer half zoe erg is umdat 't gelukkig geit um Ivan?
- Veer benuid zeen of d'r noe sjneller get geit verandere in Bemele? Zoe es beveurbeeld de weggesjepeulde veldwegen rondum Bemele?
- Veer anders op zeuk zeen nao get drugsafval umdat 't dan inins wáál sjnel kin?
- Veer dan missjien ouch met druug veuj bee de zwaluwtoren kinne komme ,.... es dae oeteindelik kump?
- want t gezegde geit één plan maakt nog geen zwaluwtoren.
- Veer deenke dat met al dat water ze missjien beter un hieringe-bruk kins bouwe dan unne zjwaluwtoren?

Wis geer dat...?

- Noe veer 't euver asgoonsdig höbbe (hierende toch?) veer veursjtelle um 't hieringegebiete dit jaor te organisere bee Stefan Pirnay...
- veer höbbe die hieringe bee Stefan op internet gezeen en die zeen d'r un sjtuk beter (en groeter) oet dan in de café...

Wis geer dat...?

- Veer us aafvraoge of ze met al dae watereuverlast bee ozze wienboer Belle Bemelen noe ouch water bee de wien hobbe gedoon?
- Veer wille benaodrukke dat es veer 't euver Belle Bemelen höbbe, veer de wien bedoele, en neet Van Belle van Bemelen...

Wis geer dat...?

- De sjeetvereniging oonder in de kelder van Die Twie tegenwoordig un nuij sjeetbaan höbbe?
- Zee tegenwoordig vanaaf de WC op de roes mikke?
- Veer houpe dat ze dan op de WC ouch get beter mikke?
- Veer dan ouch un naamswijziging veursjtelle, geer wet waal..... Sjietvereniging Bemele

Wis geer dat...?

- Veer gehuurd höbbe dat in Bemelen opnames gemaak goon weure veur de Grote tuinverbouwing op SBS6
- Veer allein mer kinne gokke dat die op de Oude Akerstraat goon plaatsveende, zoe halverwege urreges...
- veer 't frappant veende dat de eine broor van de (Thomassen) Plantprotection is de andere mier van de plantverrektion...

Wis geer dat...?

- Deun en Marion d'r met vastenaovend neet bee zeen umdat ze op vekansie goon nao lapland?
- veer houpe dat Deun de bus neet haet motte regele?

Wis geer dit allemaol? Dan wis geer mier es os.....

Wateroverlast

En toen kaom alle zege – sorry: alle rege – plotseling van bove. Wat höbbe veer 't aafgeloupe jaor allemaol euver os heen gekrege... Gods water kaom mit ummers tegelik euver Gods akker... Es-of ze dao bove de kraan neet mie tów kreges, zoe hël en lang bleef 't zeike. Tot 't dörrep 't neet mie gesjik kreeg, en op hiel korte tied – ongevraag... – veranderde in 'n parcours veur watersjporters.

Veur de lange-aafsjand-zjwummers woord de lange-aafsjtands-wandelweeg 't Pieterpad op sjlaag imgetouverd in 't Pieterbad ('t langste ope-waterbad van Limburg) en de kano-ers koste van de Sjjlingerberg aaf aan wildwatervare doen...

Sjpannende daag... Jaomer genug auch mît vööl euverlas veur luij die neet zoe gek zeen op watersjport. Euverlas die nog altied neet gans gedoon is. Wandele is op vööl plaatse nog modderkroepes en pratsjtrappele... (Dao hawwe ze later bee Bemels Beste Boeren Bergloop nog vööl plezeer van. De deilneumers hawwe de Limburgse löss tot achter hun oere zitte...) Op sommige plekke waar de weeg hielemaol de weeg kwiet. En bee de wiengard oonderaan de hei höbbe ze dit jaor es compensatie mèr 'n bitsje minder water bee de wien gedoon...

Noe zeen de Bemelenaere, en veural de gebore en getoge Berggeitte, netuurlik waal get naatigheid gewind. Die kieke neet op eine liter mieër of minder, zoelang d'r mèr alcohol in zit... Mèr dizze kieër waar 't waal érrég vööl in eine kieër. Es-of dao bove eine bedach haw dat 't dörrep ter bevordering van 't (water)toerisme beter Bemele aan de Geul zou kinne heite. Wat, geef mèr tow, in eeder geval beter kleenk es Bemele aan de Kattegrub...

Typisch: wie ze in Bemele 'n partij drugsafval voonde, waar de weeg binne drei maond al veur 'n ton of drei weer opgeknep. De watersjaaj is noe nog altied neet hielemaol oet de waereld gehollepe. Veer sjnappe 't versjil waal, mèr veer begriepes 't neet gans... En dat veer soms gèt naatigheid blieve veule, och, dat zal waal mèt de vastelaovend te make höbbe. Dao huurt noe einmaal naatigheid bee. Mèr dan keump 't tenminste glaas veur glaas oet de tap...



'T LETSTE WOORD...

Doa zit ver dan, aan toafel, mit unne pizza en unne Red Bull. Noa unne drukke daag met die twie kleine (b)engeltjes van oes. Veer hubbe ze net weer mit veul enthousiasme aafgezat bie ein van de opa's en oma's veur un logeernachje. En noe kin veer wie mit oes tweeën effe biekomme, effe bieklelsen en effe veuroet blikke op vanoavend...

Vanoavend is ut weer zoe wiet. Ut pak weer aan en goan. Gein idee oe ver precies heen goan en wie die zitting of feesoavend der oet kump te zeen. Gein idee wea van de Road of vrun precies weer mit geit. Gein idee welke inmiddels bekinde van andere carnavalsverenigingen weer doa zulle zeen. Gein idee of dr bie thoeskoms weer un paar man mit komme veur nog un pilske. Meh ein deenk weit ver zeker; dit weurt weer unne oavend mit hiel veul lache, ouwhore, polonaises renne, volop geneete en dit weurt WEER unne oavend um noets te vergeten!

Ongeluefelijk! Wie houw veer hie 'nei' tegen wille zigge? Want joa dat dachte ver, wilde ver en dege ver auch toen ze veurig joar op de sjtoep sjtinge. Meh wie diks dat veer oos sinds ut oetroope lachend aankeke, op sjtap of doanoa weer thoes, en tege elkaar zeije dat veer dit noets houwe wille misse!

Joa ut is vermeuiend, en joa de keender zeen nog klein, en joa ut kos get geld, en joa eigenlijk wilde ver neet zoe in middelpunt sjtoon, meh wat ste dr veur truuk kriegs is mit gein pen hie te besjrieve.

Zoeveul lol mit elkaar, mit de Road en reserve Road die sjtuk veur sjtuk good veur oes en veur unne houp gezelligheid hubbe gezurg, mit oes prachtige prinses Evi, mit oes eige klein prinsesjes Julie en Mila, wat zoe trots woare dat sie auch un roze prinsessekleadsje aanmoechte, mit de vrun wat oes zoeveul verras hubbe, mit de leeve zieke en ouwer luij wat ver hubbe moage bezeuke, mit de ander Preense en Prinsesse oe veer vul lol en herkenning mit hubbe ervaren, en gewoen ut contac mit dit ganse fantastische durrup; um noets te vergete!

Un klein durp oe ver zoe trots op zeen um doa te woene en doa hooglustigheden van te moage zeen! Es ut aan oes loag, bleef veer nog un joar aan! Vanaf noe goan ver extra mit geneete mit de volgende prinse en prinsesse, want noe pas sijnap veer ut. En veur diegene wat auch nei wille zigge; doe chut waal en kom oes mer bedanken es ut zoe wiet is 😊.

Ralph en Guy; bedank! Road; bedank! Opa's en oma's: bedank! De vrun; bedank! Eedereen wat mit oes mit vierde; bedank! Bemelen; bedank!

Dikke poen, Preens Dion en Prinses Catelijne en oes eigen mini Prinsesjes Julie en Mila



Oud preense met de zonneblom..

In oktober waor t dan zoewiet: t jaorliks oetsjtepke van de oud preense. Noe de mieste oud preense get op laeftied komme begint t e bitsje op un oetsjtepke van de zonneblom te lieke of unne daag op de dagbesteding. Mèr, ierlik is ierlik: 't ete waor prima, 't kiene hilarisch en de ouwe trein sjiek, allein....

Allein die bus....

Maar jongens, dat is toch dat liedje? Hoe? Nou dat liedje van "busje komt zo?" Jaaa.... Hier zijn ze dan duo Höllenboer:

Buske kump zoe,.... (op de Deun van Busje komt zo...)

Dao sjtinge twie oud preense op 't voetbalveld..

Dee eine vroeg d'n ander

Zegk höbs diech de bus gebeld?

Wienie kump noe die bus, wienie kump noe die bus,

wienie kump noe die bus, toen zag oud preens Deun dus:

Refrein: Buske kump zoe, buske kump zoe, buske kump zoe, Buske kump zoe, Buske kump zoe, Buske kump zoe, buske kump zoe, buske kump zoe, buske kump zoe, buske kump zoe, buske kump zoe, buske kump zoe, buske kump zoe, buske kump zoe, buske kump zoe,

Evekes geduld nog want t buske kump zoe...

D'r sjtinge nog mier preense, ze waore ouch al oud, de eine dae how honger de ander houw t koud, Dao kaom nog eine beesjtoon, dae zag: en iech wil beer, Veer wachtte op 't buske, dat doort noe al un keteer

Refrein: Buske kump zoe

Twie van die oud preense, die woorte al get meuj de eine houw t aan de rök de ander aan zien veuj, Zoe sjtoonte zee te zuchte en te kuime dao beeein, Es dat heij nog lang doort dan misse veer nog ozze trein.

Refrein: Buske kump zoe

Preens Deun dae ging toen belle, haet alles geprobeert mer de bus van Arirva waor nog neet gearriveert, Toen woort t hum te veul en daorum zag heer dus: veer goon waal met d'n oto, verrek mer met dien bus

Buske kump neet, buske kump neet, buske kump neet, buske kump neet, Buske kump neet, buske kump neet, buske kump neet, buske kump neet, buske kump neet, buske kump neet, buske kump neet, buske kump neet,

Dan mer met d'n oto want t buske kump neet...



Agenda 2024

2-2-2025	Kaartverkoop Zitting Berggeitte	Bemelen
8-2-2025	Grote Zitting cv de Berggeitte	Geitestal Bemelen
9-2-2025	Foto ophangen Prins/Prinses	Die Twie
23-2-2025	Kindermiddag + foto ophangen Prins/Prinses	Café Plateau Gasthuis-Bemelen
26-2-2025	Hoeskamer	Bemelen
27-2-2025	Ziekenbezoek	Bemelen e.o.
1-3-2025	Sleuteloverdracht Kerk Bemelen en Gemeente	Kerk Bemelen en Huis vd Burger Margraten
1-3-2025	Bonte Avond in Bemelen	Café Plateau Gasthuis-Bemelen
4-3-2025	Optocht	Start Café Plateau
4-3-2025	Prijs uitreiking en feestmiddag/avond	Die Twie
5-3-2025	Askruisje + Hiering Biette	Kerk – die Twie

Die drei kluge leute...



Nao 't vertrek van pesjtoer Pijpers, kaome de dreij weize oet 't Oosten... Pesjtoer Tervoort en zien kapelaons...

Ouw en Nuij preense : Zitting 2025



Bemelen in Rosso....

Bemelen In Rosso!

In 2025 viert CV de Berggeitte zien 5 x 11 joarig jubileum. Unne mijlpaal oe veer es durpke trots op kinne zien. Typerend veur Bemele is dat eeder gelegenheid weurd aangegrepe um d'r un feeske van te maken, dus oach dit momeent loate veer neet ongemerk aan us (en uuch) veurbie goan. Op 22 november a.s. organiseren veer us jubileumfees hielemaal in stijl: **Bemelen in Rosso!**

De locatie weurd umgetoverd tot de gezelligste feestzaal van Bemele en umstreken én weurd neet allein mer gevuld mit gezelligheid... *De Heeren van Aemstel* vulle de zaal mit hun ongekinde energie en muzikaal geweld. Dis band heed al mit mieërdere groete namen gespeeld en hun aovundvullende show liet uuch deenke aan de bekinde Vrienden van Amstel shows.

Dus... Reserveer alvas de datum 22 november in uuche agenda.

In de aanloap noa dizze feesaovund zalle veer mieër details bekind maken euver o.a. de kaartverkoop.

Dinsdag Groete optocht

Carnavalsdinsdag in Bemelen


Afgelopen jaar bleek wederom dat we met de "optocht nieuwe stijl" de goede weg zijn ingeslagen. Het deelnemersveld was niet alleen gegroeid in aantal, maar voornamelijk ook in creativiteit. Hoewel sommigen wat meer aanmoediging nodig hebben en anderen net niet doorschoten, is het fantastisch om te zien hoe de (straat)carnaval leeft in Bemelen!

Om deze dag wederom te laten slagen, nodigen wij iedereen uit om zich in te schrijven als deelnemer. Dit kan zijn als einzelgänger of grote groep en alles wat daartussen zit.


Kortom, duik de verkleedkist in, maak de sjoenste pekskes, lees de (gekke) gezet voor de laatste nieuwtjes, pomp de banden van de kar vast op en mobiliseer vrienden, familie en dorpsgenoten om zich ook in te schrijven of juist om alle creaties te komen bewonderen!

Voor inschrijvingen en meer informatie verwijzen we graag naar onze website www.berggeitte.nl

Netuurlik deenke veer ouch weer aan de keender, daarom weer un sjoen kleurplaat die geer maog kleure en veur de roet hange met de optocht of met de keendercarnaval... Geer maog netuurlik ouch zelf get sjoens teikene !!



NIEUWS-FOTO-QUIZ



“kDaot mèt, en weur lezer van 't Carnavalsseizoen 2025 !

Dao zeen veer weer: Uzze “ lezer van 't jaor” verkeezing of, in os geval, unne “ lezer van 't carnavalsseizoen” Eederein kin met doen, 't is neet meujlik, geer hoof bee de foto's allein mer't gooje ondersjrif te keeze. Vööl succes !!



Foto 1.
A. Boerinnenbond Bemelen op Bezeuk bee Caroline van de BBB
B. Duo XL zegk op letste moment aaf veur optreije zitting Bemele
C. Liestrekker Caroline met nuije liesdrujer BBB op de foto



Foto 4.
A. Preens en prinses zeen 't nog neet ins euver gepland aantal keender...
B. verassende antwoorden op intieme vraag “wie deks... tijdens preensetrefte...
C. “Wiedeks biste met die drei daag zaat toesgekomme? ”



Foto 2.
A. Ierste sollicitanten veur kabouterbos Bemele op gesjprek
B. La Choufe aovend Die Twie groet succes
C. Wipneus en Pum op zeuk nao avontuurtje (met un leuke heks...)



Foto 5.
A. Bezoekers Hoeskamer kriege unne sik van t wachten op verbouwing Gemeinsjapshoes..
B. Preens Luc eindelijk gevoonde nao 4 weke verdwaald te zeen in ziene veurtuin...
C. Nog auwer raadslid gevoonde in kelder gemeinsjapshoes bee verbouwing,,,



Foto 3.
A. Winnaar beste discodansen BOTS 2025
B. Zoe'n hoeg bereik wie dae hawwe zelfs de BeeGees neet...
C. Presentator rosso concert bekend gemaak



Foto 6.
A. Formule Bemels Beste / opening sjportseizoen bliek gooj melkkooij...
B. Nao kooije truijke noe ouch kooije-string verkriegbaar bee BBBB
C. Verpliech kleidingadvies veur doortoch Kooijesjal Bart Houben ivm melkmachine...



Foto 7.
A. Opnames “how to marry a millionaire” begonne..
B. Nao tiny houses noe ouch groete huiskes op de Valkenhof
C. Chateau Weijsland..



Foto 11.
A. Blij paosj-ei...
B. (inmiddels oud) Preens Dion maak echo bee Louk.... Hallo, lo, lo, lo....
C. Haortransplantatie bee Louk succesvol verloupe, nao carnavaal maog de sjtrik dr van aaf...



Foto 8.
A. Erwtensoploup Bemels Beste errug koud dit jaor...
B. Bemele neet bang veur komst wolf op 't plateau..
C. Drankpost Bemels Beste met échte Berenburger Borrel



Foto 9.
A. klusvrijwilligers verbouwing Gemeenschapshoes Bemele op weeg
B. Waarsjuwingsborden Nettenrollers geplaatst bee FC Bemele
C. Verontruste plateaubewoener (jao dao zeen ze weer) in actie tege..., ja wat neet...



Foto 10.
A. Ndeet de Sjin vikings mèr de Bemelse Vikings verovere Mestreech...
B. Bemele treft veurzorgmaat-regle tege watereuverlast
C. Neij neij, d'r maoge mer twie osse en twie ezels op de ark...



Foto 12.
A. Oud preense protesteren tege sjlech openbaar vervoer...
B. Veldsje nuij buurt verneumd nao oud-Preense Berggeitte Bemelen
C. Petitie veur heringebruukname trembaan zjwarte weeg, ivm slechte busverbeending Bemele

Dat waor 'm weer veur dit jaor...
Geer höb 'n gans jaor um d'r veur te zurrege dat geer ouch op dees pagina terech komt door veural euch sjtomste foto aan us op te sjture...
Anders is dr altied waal eine in de buurt um uch miest genante momint vas te legke...
Maak d'r dit jaor un leuk feeske van.